

# GASSETTA ROMONSCHA.

Nr. 49.

Mustér,

8 de December 1865.

## Fi para l' alva.

La malvegia encunter quels despotics signurs della redunonza federala, ch'han bucca voliu saver de conceder al pievel ses dretgs, semanifestescha pli e pli en differentas parts della Svizzeria. Per emprova de quei schein nus suondar cheu sequentas manifestaziuns:

La *Gasetta Purita della Svizzeria* scriva: »Ella Svizzeria ha la la burocracia (il domini dils emploi) priu en la piazza della veglia aristocrazia. Buc il pievel ha de decider sur pasch ed ujarra, sonder la decisiun de sias pli impurtontas caussas schai els meuns de mo paucs. Cura ch'ei setractescha per expensas de milliuns, sch'astga il pievel, che sto pagar, dir buch in plaid, sonder ei glier mo paucs, che disponan sulla buorsa dil pievel. Quel dei simplamein acceptar las leschas, ch'entgins paucs perscrivan ad el, ina ruasseivla votaziun sur sias leschas vulan ins bucca conceder; e sch'in pievel, sco quel de Baseliara, ugegia de pretender, ch'in dei schar votar el sullas leschas, sco quei che daventa da bia tschentanès enneu els cantuns pigus ed el Grischun per ventira dil pievel, sche vegn el discreditau e columniau dals burocrats. Quels dien: nus savein tgei che necessari ei! Els creien aschia, ch' il pievel segi buc el stand de renconuscher sia situaziun e ses basegns. Ed il pievel dei lu eunc haver respect dal giudei de quels, che manegian ch' el segi schi tups! Il pievel dei da paucs seschar menar sco ina montanèra senza atgna voluntad, e tutt'in'eunc mussar entusiasmus per ina falla republica; fertont ch' ei sto ad el esser ual tutina ch' el vegni regius dad entgins paucs ne moda in monarch, sch' el ha de dir nuot e mo de pagar.«

»Dei la Svizzeria daventar ferma e ventireivla, sche sto quella burocracia calar si e la suveranità dil pievel sto obtener sia compleina valeta.« — »Dei la Svizzeria restar ina republica e bucca curdar sut il domini de loscha segneria, sche sto il pievel haver de decider sur pasch ed ujarra, e de votar sullas leschas ed expensas extraordinarias. Sulettamein il *veto* ei in' ustonza encunter il niev segneradi.« — »La pretensiun de quels dretgs dil pievel ei vegnid' enviad' anavos dalla redunonza federala. Per quei deien ins era *pompusamein* enviar anavos sia orva de revisiun, mo el madem temps cun 50,000 suttascripziuns garegiar ina revisiun populara tras ina nova redunonza federala.«

La *Gasetta dil Toggenburg* cloma si: »En verdat essen nus arrivai fetg lunsch en nossa patria, sch' ils representants d' in liber pievel astgan publicamein declarar avon gl' entir mund: Nus figien tgei che plai a nus, e sefutre in buc la minima caussa pella veglia de quels, ch' han legiu ora nus. Mender ch' aschia sa ei era buc ir ella monarchia — e per quei meungl' il Svizzer bucca selegrar pli sur ses

avantatgs, ch' el gauda pli ch' il pievel ellas monarchias. Ei vegn schon ussa plidau de tener grondas redunonzas dil pievel per instradar in autra revisiun della costituziun.«

Il *Liber Bernès* segirescha: »Cun tutta decisivadat udin nus ord tuttas contradas dil cantun, che la revisiun fatga dalla redunonza federala anfi tiel pievel de Bern nagin applaus e nagina simpatia.«

Nus vein era schon fatg menziun dal conclus dil *cumin de Tuseun*. Per raschun che la proponida revisiun risguardescha bucca l' extensiun dils dretgs dil pievel, dalla qualla ei seschassi spitgar bucca mō ina pli prosperivla svilupaziun dell' administraziun e legislaaziun federala, sonder era ina promoziun della cultivaziun politica dil pievel, vul quei conclus instradar ina nova pli democratica revisiun cun entscheiver a prender si suttascripziuns el circuit ed envidar in ils auters cumins de far il madem. Tenor la costituziun federala sto ei sin giavisch de 50,000 burgeois vegnir mess avon al pievel, schebein el vegli ina revisiun ner buc, sedeclar' el per quella, sco ei glier sut las presentas circumstanzias de spitgar, sche vegn ei legiu ora ina nova redunonza federala, ch' ha de reveder la costituziun e silsunter metter avon siu project al pievel.

Sonda sera ei stau a Cuera ina redunonza de 300 umens, ch' han cun tuttas vuschs encunter 3 concludiu, de refusar tuts 9 artechels della proponida revisiun e de mirar per 50,000 suttascripziuns en favur d' ina nova redunonza federala ed ina pli extensiva revisiun, che renconoschi ils dretgs dil pievel. Glier vegnu legiu ora in comitè, che dei l' jamna della proxima fiera de Cuera clomar ensemble ina nova redunonza, ella qualla tuttas contradas dil cantun segien representadas ton sco pusseivel. — Ina numerusa redunonza a s. *Gagl* ha mademamein concludiu d' instradar ina nova revisiun el madem senn, de semetter en relaziun cun auters cantuns e provocar redunonzas dil pievel.

Quei moviment democratic legra nus, speronza che la parola de Tuseun e Cuera anfi in legreivel eho en tuttas valladas grischunas, e ch' ei vegni la fiera de Cuera tier ina nova ligia de Vazerol per difesa della suveranità dil pievel federal visavi als novs baruns svizzers.

## Suls premis per cavals.

Sche schon biars ein seteni si sulla troppa mellis, che nies davos cussegl gron ha concludiu de dar ora per premis de cavals, sche pudess ei per quels esser intressant d' udir, tgei ch' ei glier riguard la madema caussa vegnu avon el cussegl gron de s. *Gagl*. Tschudi, il president della societad agricolana, ha aviartamein declarau, ch' el tegni nuot sin quels premis per cavals, esseud che l' intenziun,

ch'in lagi giu, segi tutlavvia bucca vegnida realisada malgrad il bi danè, spendius tochen ussa per quei intent. L'exposiziun de cavals ad Arau lagi mussau, che la tratga de cavals sespiardi pli e pli el cantun s. Gagl; el fetschi perquei la proposiziun, ch' il guvern dei schar intercurir e rapportar shebein quels premis de cavals hagien giu lur effect ne buc. Quella proposiziun ei lu vegnid' acceptada.

Nus secartein che la malveglia encenter quei conclus vegni eunc a crescher, cura ch' in ei inaga sforzaus de pagar 15 fr. per schar cuvierer ina cavalla; l'ordinaziun perseriva ch'in astgi per 4 ons schar tier las cavallas mo tiels treis cavals mascals premiai.

## INTERN.

La commissiun pella viafier alpina a Florenz dei eu sia sessiun finala haver priu sequentas conclusiuns:

En riguard tehnic ei il tunel dil Gottard il pli levs de far, lura quel dil Lucmagn ed en davosa lingia il Spligia.

Quei che pertegn tier la via, che meina tiel tunel, ha il Lucmagn gl'emprez plaz, lura suonda il Gottard ed il davos il Spligia.

En riguard comercial ha la commissiun unitamein nuota voliu saver dal project, che meina la viafier sul Lucmagn senz'in gron tunel.

Concernent il comers europeic sur Brindisi e Suez sedeclara la majoriad della commissiun en empreza lingia pil Gottard, en secunda pil Spligia e per en tierza lingia pil Lucmagn.

Riguard il comers internazional denter Italia e la ulteriura Europa ha il Gottard gudognau la palma cun eunc pli gronda majoriad.

Pil comers de transit «de pintga spertadat» segien il Gottard e Spligia pauca telga, il Lucmagn stelli aber anavos.

Aschia ha il Lucmagn ad interim nagins aspects, ed il Gottard vess cartivel schon ussa gudognau la victoria, sch' in temess buc la concurenza della viafier a Marseglia e vess saviu sefidar sigl agit della Prussia. Mo tier quella interpresa meunc'ei eunc adina la principalitad — ils danès.

**GRISCHUN.** La commissiun dil stand ha puspei renouau il contract de sal culla salina argauica de Rheinfelden aber mo per 5 ons e per in prezis sbassau. Il tschenè sal, che steva vivon al cantun franco Cuera fr. 3. 95 ct., vegn ussa mo sin 3 fr. 24 (cul sac vitier). El contract ei vegnu reservau, che las vals de tschei maun dils quolms: Mesanc, Giadinast, val Mustair e Samnaum possien retrer il sal dad' in auter liug; aschia po era il cantun retrer in cert quantum sal pella biestga danunder ch'el vul. Vitenberg ha offeriu in tal per 2 fr. 70 ct., ils chemiebers declaran quel per fetg luns, mo las emprovas dils economs ein stadas meinsfavoreivlas. Era l'Austria ha giu fatg sias offeras, mo il sal de leu vegneva pli cars. Malgrad quella sbassada vegn il cantun a vender ora il sal sco tochen ussa per 22 fr. il sac e gudognar 17.000 fr. dapli; aschia che la contribuziun sil sal vegn sigl avegnir a purtar en circa 170.000 fr. enstagl mo fr. 150.000. — Pervia della revisiun della costituziun federala ha la commissiun dil stand buc enflau per necessari de clomar en il cussegl gron, sonder de surschar quella totalmein allas vischneucas.

— La fiera s. Andriu a Ligieun ei puspei ida mal. Schegie ch'ei gliet vegnu catschau sin quella mo 2000 armauls, sch'han ins tuttina stoviu vergar giu cun de bia biestgam. —

— Era la Potenza vul bucca star anavos ella vertenta questiuun federala. Sut presidi de Sgr. bundslandammann Brosi ei domengia vergada vegnu tenuu a Jenaz ina redunonza de deputai dell'ontira vallada, ch'han concludiu

de sustener la protesta de Cuera pervia della viafier e la collecta della 50.000 sullascripziuns per ina nova revisiun, che concedi al pievel ils desiderai dretgs. Sco deputai silla proxima redunonza a Cuera ein numnai Brosi, major Walser e mistral Salzgeber.

— Er' ils cumins de Lumnezia, Sursès e val Mustair han s'expectorau en favur della protesta concernent la viafier alpina.

— Sco unfrenda della colera a Neapel ha era Sgr. Capitani Ludvig Carigiet de Mustèr, stoviu tener leu en ses 66 ons. El ei staus 25 ors el survetsch napolitan, ha fatg la campagna de Sicilia, ei lu turnaus cun ina biala pensiun anavos en sia patria. Leu ei el vegnus numnaus commandant dil landwehr ed ei avon entgens ons puspei turnaus a Neapel, nua ch'el viveva retratgancin. Er' in auter vegl guerier della Surselva ei ad Ursera daquort spartius da questa vela, numnadamein Sgr. colonell Caprez de Trun. Quel ha giu surviu sul Napoleon il gron, ha fatg cun el las campagnas en Spagna ed ella Russia, sco littenent ha el battiu ella horibla battaglia della Beresina. Turnaus ella patria cun pensiun eis el vegnus colonel della milissa ed arrivaus silla vegl'adelgua de 86 ons. Els ruaussien en paschi!

— A Vicosoprano ei berschau giu ina gronda, casa de bi miezdi, duront ch'ei deva nagin suffel e sper ina reha fauteuna, mo ell'entira Bergagliasù er'ei d'enflar nagina squettra, naginas scalas e harpuns per fiug!

— En in avis poetie fa il Fœgl d'Engiadina de saver, ch'el lagi sco Victor Emanuel enflau per bien de midar sia residenza, de translocar quella da Zug a Samada, e scriva el madem numer: «Las noviteds ed ils di cuers del di s'agiran preschaintamaing sün las bacharias (mezcas); tuots ils Engiadinais haun lascho d'una vart la questiuun Ryniker, la questiuun della via d'fier alpina e la revisiun della costituziun federela per discuter e s'occupar unicameing cun salsizs, liangias, jambuns e pizs d'pchürina!» Ei displai, che nus savein dalla Surselva bucca notificar il madem, leu ei ussa tut ch'ha de far culs deivets e culla miseria de danès.

**BERN.** Ella Parteu existan 12 fabricas de sulperins, che furneschan anual 30 milliuns scattas sulperins en val-senn de fr. 200.000.

— La collecta pils disgraziu de Burgdorf munta presentamein siu in quart milliun.

**S. GAGL.** La fiera de Sargans dals 4 d. q. ei puspei stada fetg frequentada. Quella gada han bucca mo ils Talians comprau si, sonder ei gliet era vegnu catschau giuviars. Mo ils prezis eran bass, per 110 e 120 fr. ei vegnu vendiu pulitas vaccas, ch'eran sin far vadi. Las principalas pagavan 14 marengins. Empau meglier ei ju silla fiera S. Gion el Toggenburg, ils prezis erien leu dalla davosa fiera enneu salzai per in marengin il tgau.

**TESSIN.** Sco curiositad vegn ei relatau, che tuts 7 commembers della regenza hagien aspirau silla plazza federala de director della duana a Ligieun.

— Il cussegl gron ha ils 2 d. q. sedeliberau sulla questiuun riguard la concessiun pella viafier, mo concludiu de spitgar culla decisiun entochen ch'ei vegni eunc dau en in tierz petlitem de concessiun da Genazzini, Hudson e Comp. — ina societad inglesa, che vul baghiar sul Gottard e porscha in assegu sco cauziun.

## JESTER.

**AUSTRIA.** Gl'imperatur va a Pest per arver leu en alga persuna il parlament ungres, sil qual tut ei spaniau. Franz Joseph vegn leu a vegnir retscharis cun grou entusiasmus, mo el dei era haver sempitgau in gron schengeltg — ina generala amnestia — priu ora per Kossuth — cun turnar anavos tuts beins sequestrai. In spetga che la

Ungria vegni per suenter bucca vuler sefar memia independenta da Viena e dallas autras provinzas austriacas.

**ITALIA.** Malgrad la guerila peroraziun rojala tiell'aver-tura dil parlament vegnan ins nuort la pupira dellas finanzas a vegnir sforzai de relaschar 60,000 umens ord l'armada per cheutras spergnar 40 milliuns. — La colera a Neapel ei ussa tschessada zun fetg.

— La regenza papala pretenda d' haver mussaments en mauns, che la partida piemontesa, che vul incorporar il stat roman all'Italia, sustegni ils brigants. Quels vegnan dals Piemonts bein pagai ed armai per far sgarschur e devastaziuns egl entir stat papal, entochen ch' il murdergiau pievel elomi la truppa piemontesa en agit. Perfin a Roma deien ils madems revoluzioners haver organisau ina banda de laders. Igl ulteriur plan de quella partida segischi gleiti ch' ils Franzos hagian bandunau Roma, dei sin in signal dils conspiraturs il militèr papal vegnir disarmaus, e sch' el fa resistenza, vegnir massacraus; sin quei dei ei vegnir tschentau si ina regenza provisorica e tras ina generala votaziun proclamau Victor Emanuel sco retg de Roma.

**INGELTIARA.** Sill'insla Jamaica, ellas Indias occidentalas, han las autoritads colonialas d' Ingeltiara comess in act de barbaria, che selai en nagins graus segiustificar. Sil blut suspect, ch' ils negers hagian leu fatg ina conspiraziun encunter ils alvs, eir. circa 2000 de quels paupers selavs vegni massacrai; auters ein vegni bastunai sin ina horribla moda!

**SVEDA.** Quella tiara, che ha el novissim temps scandalisau l' Europa civilisada tras sias crudeivlas leschas encunter quels, che vegnan Catolics, ha puspei priu si en sia nova constituziun l' intolleranta determinaziun, che mo Protestants astgien survegnir uffecis e piazzas dil stat. —

**AMERICA.** President Johnson ha comondau a siu ambassadur mexican, ch' el dei serender a Texas, nua che Juarez, igl expresident della exrepublica Mexico ha sia residenza. Ei para aschia, che l' America vegli bucca renconoscher gli mperi mexican, ina malla pella Fronscha e siu imperatur Maximilian.

## Novas pli recentas.

Il cus egl federal ha concludiu de far pass tiel guvern franzos pervia dell' alzada per legalisaziun de scartiras.

Da Bern vegn ei scetel: »El palaz federal temen ins ehe la decretada revisiun vegni refusada dal pievel. Dal cantun Vat han ins schliatas novas ed a Bern ei la vusch generala pella refusiun. in vul saver nuot da quei cuntschergnem. U star tiel veder ne reveder tut auter. Ei vegn ris sul Bund, che cusseglia de bucca clomar giu la redunonza fedorala sender de mo surdar ad ella ina petiziun, ch' ella dei prender si il veto!

In spetga mintga moment la mort dil retg Leopold de Belgia,

## Feuilleton.

### Ina discussiun sur ils punets de recapitulaziun en la vischneunca de L.

(Termess en.)

**President:** Stimai vischins! Sco enconoschent havein nus la domengia vargada concludiu, d' oz dar nossa sentenzia sur ils punets de recapitulaziun. Vos vignis perquei ad haver, palertgiau pli u meins suenter quels et ei vegn segiramein ad esser slau la ser'en vossas redunonzas savens denter vos il disquors, quals de quels seien en

nossas, relativs circumstanzas applicabols, giosts ed avantagius, quals encuntercomi seien bucca dueivels e bucca giosts et perquei vengonzs della sentenzia de mort. Oz pia vegniss vos cun in dretg e ver spert republican a seneziar de vossa suveranitat e demussar a vossas supremas auctoritads, che vos enconoscheies l' impurtontat de quest moment e che nus Grischs seien nuot aschi tups et ignorantants sco Dr. A. Escher e consorts volen pretender a Bern. Della pli grond' impurtonza per nus purs ei segir igl εμπrem punct de recapitulaziun, il qual domonda, sche nus voleien approbar la proposiziun de lescha, la quala vol ina taglia suenter rauba, sco igis ons vargai e buc ina taglia suenter representants. Jeu vi ussa pia primariamein arver sur quest punct la discussiun.

**Mistral Hans:** Segiramein ei quest punct dalla pli grond' impurtonza per nus purs. Perquei arveien nos eglis. Vos haveis tuts udiu cun tgei gronduisa majoritad quest punct de recapitulaziun ei vignus refusaus dalla populaziun de Cuera. Pertgei motiv ha quel aber buc anflau grazia tier nos Sgrs. capitalists, emplojai, negoziants e mistregnes a Cuera? Ord quei motiv che tut quels pretenden, che nus purs seien en la taglia suenter facultad privilegiai. Els segagliardeschen, de tschentar si la pretensiun, che nus pageien tenor il capital, che nies biestgam figurescha, ina per lunsch memia pintga taglia, gie entgins van aschi lunsch e gin. che quei capital sei quasi totalmein libers della taglia. Els vulan bucca patertgiar suenter ils mellis e mellis francs, ils quals il regal de sal port' annualmein en al cantun e ch' il sal vegn per la gronda part consumaus de nos tiers, schiglioc astgansen els bucca pretendèr, ch' ils 12 milliuns francs, ils quals fan ora la valeta de nies biestgam, seien libers de taglia. Ei drova nuot rumper il tgau, per anflar, che la taglia suenter facultad sei pli giesta e dueivla, che quella suenter representants e quei eunc principalmein ussa suenter las midadas, fatgas dal lud. cussegl gron d' uon. Miu meini ei d' approbar quest punct de recapitulaziun.

**Gierau Hasper.** Gie, gie la taglia dei esser suenter rauba e bucca suenter tgaus. Jeu cun mia simpla testa purila vi nuota pagar ton sco quellas cavazzas grondas, seien allura vitas, ne pleinas. Tgi sa qual gauda pli bia benefecis cantonals, il pur en la lozza, ne il signur en croscha. —

**Scarvon Gioder:** Jeu fuss din auter meini. Jeu serègordel eunc che nus pagaven nuot taglia; in ha lura entschiet cun 85 centims per melli —, sil suenter fatg dar 1 fr., pli tard 1 fr. 20 cts. per melli ed ussa vul nossa regenza commendar a nus de pagar 1 fr. 30. Las pretensiuns vegnen pia traso pli grondas. Entochen quest moment havein nus pagau cun tuta resignaziun e pazienza quei, ch' ei vegneva pretendiu. Nus vulein uss' aber volver gasacca cun quels signurs della busra e clomar tier ad els cun la madema gagliardia, cun la qual' els pretenden de nus pli a pli bia: »Nus pagein a vos nuot pli, demai che vos esses mai contents.»

**Pliurs purs:** Nus fussen era da quel meini. Naven cun quellas taglias! Volein mirar, tgi commond' alla finala la fiasta, nus purs en nos calzèrs grobs, ner quels signurs blaus. —

**Stattalter Paul:** Tadlei eunc in plaid, mes buna vischins. Vos mai oz empau ualti lunsch en vossa vohè-

maenza. Ins observa schon, ch'ei vegn tractau enzigel, che trai per las ureglias a vossa bursa. Ei gliet ver, nus havein ussa memia gronds quosts. Nossas auctoritads han memia pauc senn per simpladat repuelicana e per sparg-nusadat, denton fuss aber era vies meini pervers, de nom-nadamein pagar zun negina taglia. Scadina schliusa sto haver in tgamun. Nus dovrien absolutamein nossas auctoritads ed emploiats e doveien selarisar quels sufficientamein. Mo nus essen buc obligai de continuadamein schar alzar las auctoritads sezzas lur salaris e quels dils emploiats. Il fumegl ed il patrun ston seconvegnir pervia della pagaglia. Narrs fuss aber il patrun, che porschess ad in survient 3000 fr., sch'el anflass 50 auters cun mademas, sche buc eunc cun meglieras qualitads mo per 1000 fr. Nus, ner nossas auctoritads en nies num, ein era savens obligadas, de schar plascher biaras expensas en nies agien avantatg e fetg biaras per vegnir suenter allas obligaziuns, visavi la confederaziun. Denton havein nus era cheu puspei il dretg, de metter tiarms e clomar tier: Auctoritads entochen cheu e bucca pli lunsch! Mo l'unien!

**Gieri:** Jeu creitg, ch'ei sei oz buc in maladatau moment, de patertgiar, co metter tiarms a nossas auctoritads en lur expensas e quosts. Nus volein, tenor miu meini, approbar quest punct de recapitulaziun, aber cun declarar de speras, ch'ei stoppi decheuenvi vegnir spargnau pli bia, o ch'in franc per melli dovei esser il maximum dolla taglia. Corrisponden nossas auctoritads aber buc a nos giavischs, sch'eis eis allura de patertgar suenter remiedis, co vegnir tier nies intent ed allura spargnar ni mazza ne eucla.

**Plirs purs:** Quel havess plidau, sco in pur dovei plidar.

**President:** Tgi ch'ei pia dil meini, d'approbar quest punct de recapitulaziun en quest proponiu senn dovei seschar dombrar.

**Dombrawuschs:** Per l'approbaziun de quest punct cun l'allegad'annexa han tuts 401 votants cheu sil plaz votau. —

## Publicaziuns.

Ella stamparia a **Mustèr** tier Sgrs. Casut e Comp. a **Glion**, Sgr. Marcadont Elviedi a **Cumbel** e Sgr. Jacob Schmid a **Casti**, eis ei d'haver **culichs d'oraziuns**, il **calender romonsch e la cristianu catolica doctrina** en damondas e rispostas (la schimmnada doctrina gronda.)

### Annunzia de mort.

Nus figiein de saver a nos stimai Parenzs ed Amitgs, che

**Sgr. Cavalier Commandant  
Ludvig Carigiet**

segi morts dalla colera a Neapel ils 21 de Nov., providius cun tuttas consolaziuns della religiun, e recomandein el alla pia memoria de scadin.

Mustèr, 4 de Dec. 1865.

**J. Ant. Carigiet**, domeantor, frar.

**P. Baseli Carigiet**, nef.

## Annunzia.

**Assoziasiun d'agit per ils RR. Sgrs. spirituals.**  
Anno 1864 eran 14 Sgrs. spirituals participants, dils quals per 1865 han 3 (Nr. 3. 10. 14.) bucca separticipau pli tenor § 8. — Entrai en encuntereami 3 novs commembers. (Nr. 15. 16. 17.) — Restan pia per 1865 commembers participants 14. — La dividenda dil tscheins dil capital fondo ei sco anno 1864 fr. 50 sin 14 = fr. 3, 57 ed il tscheins relativ de mintga particular tenor §. 4. — Ils danès tenor §§ 3. 4. 8. san vegni liquidai tier il suttascret a Glion, tier il Sgr. Canon. Tini per la val Mesauc, tier il Sgr. secretar Stiefenhofer per la Lomnezia, tier il Sgr. Pleivon Beer per la Foppa, tier il Sgr. Hofcaplon Fetz per il Lichtenstein. —

Glion ils 28 de Nov. 1865.

**Dr. J. F. De Pozzo.**

### Instrumente de sunar

cun 4—36 melodias, denteren magnifets instrumente cul sun dils zens, che datan sil schumber e sunan culs zens, che sunan flauta, cun vuschs celestias, cun mandolinas; milsanavon

### scatlas de sunar

cun 2—12 miets ne composiziuns melodicas, necessers, scatlas de cigarras, albums per fotografia-, vischals de scriver, cassetas svizzeras cun musica, tut tiglian ora ne maliau finamein, adina rauba la pli moderna, ha **J. H. Heller a Bern** de vender. — Franco — Instrumente e scatlas de sunar lavigiati vegnan pinai dad el.

Quels instrumente, che legran cun lur carinas melodias il cor de scadin, duessen ins haver en scadina sala e sper il leg de tut malseuns.

### Canzuns a 4 vuschs

per il

### Chor viril,

vertidas e publicadas en

### lungatg rhaeto-romonsch

da J. A. Bühler,

per il prezi sbassau de 40 ct.

Milsanavon san ins haver:

### Curta instrucziun

per emprendre il

### Lungatg tudestg.

en

### scolas ruralas romonschas,

scritta da J. A. Bühler.

Il prezi per igl exemplar ligiau ei 1 fr. 15 ct.

Empustaziuns ein de far on brevs francadas tier

(3) **Gion Ant. Pradella a Cuera.**

### Enflau,

denter Mustèr, e Somvitg ina roda d'in car pign, de sadressar tier Gion Bat. Lehmann a Zignau.

### La watta de Dr. Pattison

levgiescha cuninaga e medegescha dabot de tuttas uisas **convulsiuns e rematismus**, sco dolurs el pèz, el cugliez, en fatscha e dils dens, il duler il tgaun, ils mauns o la schanuglia, dolurs dil magun e dil venter etc.

En pachets ded 1 fr. e de 60 centims cun entruidament co duvrar quei bien remiedi, veramein reals de retrer mo tier ils Sgrs. **Walther ed Otgiati a Cuera**, ed **A. Föhr apotecher a Glion.**

**Attestat.**

Mes mals reumatic, ch'jeu svel de 12 ons enneu, han daplì entgin temps totalmein schau suenter tras metter si watta de Dr. Pattison. Engraziel zun fetg etc.

Jean Baur,

chez Mons. Juilleret.

Rolle, 17 Matg 1864.

### Tiers jasters.

Ina nuorsa alva nuota, ureglia dretga gindasum ed in gavigliel davon en, tier **Giachen Tumaisch Camenisch a Trun.**